

myt waren berouwe en pure bichte
ende rechten gheloue **D**ijn guede geest
moet my wtleyden in dat rechte leit
in dat leit der leuendigher op dat
ich dy daer coenink der glorien en
schepper alre dinghen moeghe sien
in dijne glorien **E**n dat ich dy daer
moeghe hebbe voer mij oueruloedi-
ghe loen en ewighe blijscap **A**men
¶ Christus is voer ons gheworde
onderdanich totter doet. en totter
doet des cruces. **H**ere vhoer. **Collecta**

O here **J**esu chre die luden toe
toe daghe hanghende iden
cruce dijnen vader bedeste voer dijne
pynighers. den discipel beueelste dij-
re moeder. den moerdener gheuestu
dat paradys. onse cranchheit riepstu
in dy ghelaten. dy dorstede nae onse
salicheit. en doe alle dinghen wil-
lenbracht weren beueelstu dijnen
gheest inden handen des vaders